

MitID aamma NemLog-in pillugu inatsisip allannngortinneqarnera (Suliffiup iluani it-systeminik atuisup aalajangersimasup taamaammallu qarasaasiat systemiinik atuisinnaasup kinaassusaata nakkutigineqarnerani uppersarsarneqarneranilu MitID-imik aamma NemLog-in-imik aaqqiinermik atuisinnaatitaaneq aamma immikkoortortaqarfiit inatsisitigut akisussaaffigisat, EU-mi/ EØS-imi nunami allami nalunaarsorneqarsimasut MitID-mik aaqqiinermik atalersinnaanerannut periarfissaq) pillugu inatsisip Kalaallit Nunaannut atortuulersinneqarnera pillugu peqqussut
(Naalakkersusiut Siulittaasuat)

Saqqummiussissut

(Naalakkersuisut Siulittaasuat)

Siullermeerneqarnera

Siunnersuut inatsisitigut aaqqiineruvoq, taannalu aallaavigalugu Kalaallit Nunaanni paasissutissatigut isumannaallisaaneq pitsanngorsarniarneqarpoq. Siunnersuut aallaavigalugu suliffeqarfiit innuttaasulluunniit pisussaaffilersorniarneqanngillat, ajortumillu sunnarniarneqaratik.

Inuiaqatigiinni ineriartorneq ilutigalugu, inuiaqatigiinni digitalimik isumannaallisaaneq pitsanngorsarneqartuartariaqarpoq. Uanilu teknikkimik siunnersuuteqarnermi inuiaqatigiinni digitalimik isumannaallisaaneq pitsanngorsaaffiginiarneqarpoq.

Naak siunnersuut teknikkimut attuumassuteqaraluartoq, oqaatiginiarneqarpoq MitID-p NemLog-inillu aammalu tamanna pillugu allaffissorneq nutarnerneqassasoq inuiaqatigiillu pisariaqartitaannut naleqqussaasoqassasoq.

Siunnersuummi anguniarneqartoq tassaavoq MitID-p NemLog-inillu atorneqarnissaata annertusineqarnissaa.

MitID tassaavoq innuttaasut suliffeqarfiilluunniit elektroniskimik kinaassutsimut uppersarsaataat, taannalu assersuutigalugu netbankimut iserniarnermi imaluunniit sullissivik.gl-imi imminut sullinniarnermut atuiniarnermi atorenqartarpoq.

NemLog-In systemiuvoq, taannalu atorneqartarpoq atuisut innuttaasulluunniit digitalimik imminnut sullinniarnermi MitID-mik atuissatillugit pisortaqarfiit suliffeqarfiillu atugassaat.

Manna tikillugu MitID aamma NemLog-in nittartakkatigut digitalimik imminut sullinniarnermi taamaallaat atorneqartarpoq. Siunnersuummili periarfissiissutiginiarneqarpoq pisortaqarfiit suliffeqarfiillu namminersortut suliffeqarfiup iluani qarasaasiaqarnermi systemiminnut MitID atorsinnaalissagaat.

Tassa imaappoq sulisut sulinerminnut atortagaannut atorneqalernissaat. Assersuutigalugu sullissinermi systemit iserfiginiarnerini imaluunniit isissitit (password) allannngortinniarnerni iserniarnermi.

Taamatut MitID atorlugu periarfissaqalernermi, suliffeqarfiup iluani qarasaasiaqarnikkut isumannaassuseq pitsanngorsarneqassaaq.

Siunnersuummittaag qulakkeerniarneqarpoq suliffeqarfiit Europamiittut MitID-mik atuisinnaanissaat, taamaalilluni suliffeqarfiit Europamiittut suleqatigineqartillutik paasissutissanik isumannaallisaaneq aamma pitsaanerulissalluni.

Taama annikitsumik oqaaseqarlunga siunnersuut Inatsisartuni sammineqaqquara.